

# GIDA

5 URTE

POXPOLIN



I. K. A.  
IBAIZABAL

**POXPOLIN**

Hezkuntza, Unibertsitate eta Ikerketa Sailak  
onetsia 1992-XI-11

Egileak: **Mari Angeles Angoitia Goioaga**  
**Milagros Egiguren Urkizu**

IKA-IBAIZABAL Argitaletxea  
Zornotza (Euba) - Tnoa. 673 42 46  
Legezko Gordailua: BI - 2.477 - 92  
I. S. B. N. : 84 - 86.399 - 35 - 1  
Inprimaketa: Igarri, S. C. L.

## AURKIBIDEA

## IPUINAK

**\*ASTOA ETA TXAKURRA**



**\*PATXI ERREMENTARIA**



**\*GABONAK**



**\*ASTOKARGATUA**



**\*ASTOA ETA OTSOA**



**\*IPARRAIZEA ETA EGUZKIA**



**\*EGUZKIA ETA IPURTARGIA**



**\*MIREN ESNETARIA**



**\*ARRANTZALE TXILIBITU-JOTZAILEA**



## HIZKUNTZAREN GARAPENA

Eboluzio aro honetan hizkuntzak hiru ezaugarri ditu:

-Iharduera guztiei laguntzen deutse. Umeak hitzeginez egiten ditu gauzak, egiten dabilena bere buruari kontatuz; bere hitzak ekintza adierazi eta ekintzari lagundu egiten deutso.

-Apurka-apurka, monologo hori barruratu eta isila bihurtzen da. Laster ekintzatik bereiziko da eta beharbada hau baino lehenago joango da eta berau bideratuko dau.

-Gizarte hartuemonetarako funtzioa betetzen dau. Umeak bere mezua ulertarazi nahi dau, baina laugarren urtearen hasiera bitarte ez dau lortzen benetako alkarrizketarik.

-Unibertsoaren eta norbanakoaren objetibazioari laguntzen deutso.

Aro honen hasieran, eta lau urte bitarte, umea "oinarrizko hizkuntza" jasotzen dabil oraindik, eta honen ganean joango da elementu konplexuagoak egokitzen. Bi eta hiru urte bitartean hizkuntzaren benetako "eztanda" emoten da.

Kantitateari dagokio hemen esaten dana (bi eta hiru urte bitartean umeak eguneroko gauzei buruzko oinarrizko hiztegia hartzen dauala uste da, 200etik 1000 hitz bitarte erabiltzeko gai dalarik), eta kalitate eta konplexutasunari dagokionez ere gauza bera esango geunke (esaldiak lehen baino luzeagoak dira, nahiz eta gramatikalki batzuetan gaizki erabili).

Urte bi eta urte bi t´erdiko bitarte horretan umeak aditzak infinitiboan erabiltzen ditu batez ere, eta ez ditu izenordeak erabiltzen, ezezkoa esateko aditzari "ez" bat ipintzen deutso, eta lehenengo adjetiboak azaltzen hasten dira (handia, txikia, ...).

Urte bi t´erdi eta hiru urte bitartean azaltzen dira lehenengo izenordeak, umeak aditzak orainaldian eta aginteran erabiltzen ditu eta ezezko esaldiak eta galderazkoak hasten dira.

Izenordeak erabiltzen dituan neurrian umea bere irudi propioaren garapenaren erreferentzia emoten joango jaku.

"Ni" agertzeak bere garapeneko une oso garrantzitsua adierazten deusku.

Hasieran, umeak zerbaiten beharra edo nahia adierazteko erabiltzen dau.

"Ni" hau era sortzailean eta egoera barrietan erabiltzen dauanean eta "Ni" eta "Zu" nahasketarik barik edo nahasketa gitxirekin erabiltzen dituan, bere gaitasuna adierazten ari zaigu bere burua objektu lege irudikatze objektuen unibertso baten. Hau adimen eta ezagutza mailako ekintza bikain edo hazaña bat lege kontsideratzen da.

Hiru urte aldera, umea esaldi sinpleenak zuzen esateko gai da: izenordea edo izena eta aditza. Hizkuntzaren legeak aurkitzen dituan umeak, ahaleginduz eta errakuntzak eginez, aurrerapen nabariak gertatuko zaizkio.

Hiru urte eta hiru urte t´erdi bitartean plurala azaltzen da, adberbio batzuk erabili leiz (gainean, gero), deklinabidea erabiltzen dau kasu batzuetan, aditzak geroaldian eta lehenaldian erabiltzen ditu, eta sarritan erabiltzen ditu noiz? eta zergaitik? galderak.

Zergaitik? honek informazioa batzeko eginkizun intelektuala dau, baina baita afektibitate mailako beste eginkizun bat ere: helduari lotzea, beronen arreta erakartzea, ziurtasuna aurkitzea, larritasuna baretzea, eta helduak ezarritako arauak eta ohiturak ezagutzea eta arakatzea.

Lau urterekin, esaldiak guztiz osatuaren itxura hartzen dau: umeak izenorde konplexuak erabiltzen ditu eta egoki erabiltzen ditu ezezko esaldiak.

Oinarrizko hizkuntza eskuratuz gero, umeak entzundako hizkuntza aztertzen jarraitzen dau eta erabilpena guztiz menperatu arte saioak egiten ibiltzen da. Honan, umearen hizkuntza osatzen joaten da hizkuntza egitura konplexuagoak bereganatuz.

Horregaitik, umeak ingurunetik jasotzen dituan hizkuntza eragin edo estimuluak zenbat eta hobeak eta garrantzizkoagoak izan, orduan eta erabakiorragoak izango dira umearen hizkuntza eskurapenean.

Lau eta bost urte bitartean, umeak aditzak modu aberatsago baten erabiltzen ditu.

Sei urterekin, esaldi konplexuak osatzen ditu eta aditzarekin akatsik ez dau egiten ia. Zerbait kontatzen dauanean, gertakizunei buruzko gauzarik funtsezkoenak esaten ditu, batzuetan ordena kronologikoan nahasten bada ere. Bestalde, umearen mintzairaren ezaugarriak, adibidez astiro hitzegitea edo melodia oso espresiboa, galtzen joango dira denporaren poderioz.

## 1.GAIA “ NIRE HERRIA POLITA DA”

### - HIZTEGIA

-Izenak: herria, auzoa, kalea, etxea, parkea, dendea, ikastolea, semaforoa, eleizea, udaletxea, espaloia, iturria, aparkalekua, plazea, etxebizitza, azokea, eskaparatea, errepidea, pisua, zinea, geltokia, eroslekua, pasealekua, errekea, alkatea, dendaria, abadea, zubia, taberna, botikea, lorategia, kalegarbitailea, pastada, zirkulazioa, autobusa, kamioia, kotxea, kanpaia, buzoia, gasolina, kutsadura.

-Adjetiboak: gorria, orlegia, laranja, handia, zabala, estua, polita, zatarra, itsusia, garbia, zikina, txukuna, argia, iluna, bajua, altua, ederra.

-Aditzak: garbitu, zikindu, igon, jaitsi, errespetatu, ikusi, begiratu, ibili, pasatu, saldu, zaindu, erabili, etorri, joan, itxaron, geratu, margoztu, ezagutu, ikasi, jolastu, hartu, itzi.

-Adberbioak: behean, goian, gainean, han, hor, hur, hemen, aurrean, baztarrean, ondoan, erdian, azpian, kontuz, bizkor, astiro, inguruan, kanpoan, ondoan, barruan, ertzean.

## " ASTOA ETA TXAKURRA "



### IPUINA

Uda erdia zan eta izugarrizko beroa egiten eban. Nekazari bat feriara joian astoa eta baserriko txakurragaz. Astoaren saskietan tomateak, letxugak, kipulak, piperrak eta azenarioak eroiazan ferian saltzeko. Saski batean ogi zati eta hazur batzuk ere baeroiazan txakurrarentzat. Han joian ibili eta ibili. Halako baten nekazaria gelditu egin zan, atsedena hartzeko asmoz. Eta hain gozo egoala itzalean, loak hartu eban. Bitartean astoa bide ertzeko bedarra jaten hasi zan, benetan gose zan eta. Txakurra ere gosez egoan baina saskiak hain altu egozanez ezin eban bere janaria hartu.

-Adiskide -eskatu eutsan astoari- makurtu zaitetz apur bat hazurrak eta ogia hartu daidazan.

-Zuk jateko makurtu? Egon horretan -erantzun eutsan astoak. Eta bedarra jaten jarraitu eban ezer gertatu ez balitz legez.

-Ez zaitetz holangoa izan. Zuk zeuk ederto jaten dozu eta ni hemen goseak hilten!

-Ba, hor konpon -erantzun eutsan astoak modu txarrean. Eta harantzago joan zan beste landa batera.

Eta han egoala, konturatu barik, otsoa etorri jakon haginka eta hilteko asmotan. Txakurrak urrunetik ikusi eban eta nagusia iratzartu eban bapatean.

-Zoaz, Txuri, eta bialdu eizu otso hori hortik -esan eutsan nagusiak.

Joan zan txakurra hausika otsoa eta astoa egozan lekura eta, heldu orduko, otsoaren gainera egin eban salto. Otsoak, erasotuta sentitu zanean, askatu egin eban astoa, bere burua defenditzeko. Baina Txuri gogorra zan eta ez eban atzera egin, haginka egin eutsan otsoari amurru biziz, lurrean erdi hilda itxi arte.

Orduan astoari begiratu eutsan eta bildurrez dardarka egoan gaixoa oraindik. Hanketan odola eukan.

-Asto gaixoa -esan eban txakurrak-, ez izan bildurrik, amaitu da dana. Zatoz nire ondora. Hankak odoletan daukazuz eta nik osatuko deusudaz. Astoak lehenago egin eutsana gogoratu barik, bere ondora joan eta, kontuz kontuz, zauriak miazkatu eutsazan. Astoak, lotsaturik, zera esan eutsan ahots apalez:

-Eskerrik asko, Txuri. Zu bai bazarala benetako laguna. Zugaitik izan ez balitz dagoeneko hilda nengoke.

Nekazariak pozik ikusi ebazan txakurra eta astoa alkarren ondoan eta bizirik. Ez eban hareen alkarrizketa ulertu, baina bien ondora hurreratu eta burua laztandu eutsen bie.

## **ALKARRIZKETA**

\*Nora joian nekazaria?

\*Nogaz joian?

\*Zer daroa astoaren saskietan?

\*Nekazaria bidean lotan dagoala nor etorri jaken hilteko asmotan?

\*Zein zan txakurraren izena?

\*Nor geratu zan lurrean erdi hilda?

\*Nork esan eban "Asto gaixoa"?

\*Nork osatu deutsoz astoari hankak?

\*Zer egin eutsan kontuz-kontuz?

\*Zer esan eutsan astoak txakurrari?

\*Ulertu eban nekazariak astoaren eta txakurraren alkarrizketea?

## **- HIZKUNTZA FUNTZIOAK LANTZEN -**

Informazioa  
eskatu:



Informazioa  
emon:

- Nor zara zu?
- Zein da zure izena?
- Non bizi zara?
- Ni Miren naz.
- Nire izena Aintzane da.
- Eta hau Koldo da.
- Hau nire ama da.
- Ezagutzen dozu nire ama?

Eskeintza  
egin:

- Gailetea, esnea, ... nahi dozu?
- Nork behar dau gehiago?
- Gailetarik behar dozu?

Eskeintza ez  
onartu:

- Ez, ez dot nahi.
- Ez, hainbeste ez.
- Ez dot nahi gehiago.
- Humm, hau ba gozoa!

Satisfazioa  
adierazo:

- Ederra dago!
- Gehiago nahi dot.
- Ekarri niri be.

## - IPUINEKO ESPRESIOAK

- \* Izugarrizko beroa.
- \* Ibili eta ibili.
- \* Egon horretan.
- \* Ez zaitez holangoa izan.
- \* Hor konpon!
- \* Asto gaixoa.
- \* Ez izan bildurrik.
- \* Kontuz-kontuz, zauriak miazkatu.
- \* Zu bai bazarala benetako laguna.

## -IPUINEKO HIZTEGIA

-Izugarrizko, nekazari, feriara, saskietan, hazur, atsedena, itzalean, bide ertzeko, bedarra, adiskide, makurtu, landa, haginka, iratzartu, hausika, erasotuta, askatu, miazkatu, lotsaturik, ahots apalez, alkarrizketa, laztandu.

## 2. GAIA “ UDAGOIENA, ZUHAITZAK ETA IGALIAK”

### HIZTEGIA .

Izenak: urtaroa, udagoiena, eguraldia, igalia, zuhaitza, enborra, hostoa, susterra, azala, hazia, sagarra, makatza, laranja, intxaurra, mahatsa, gaztainea, hurra, sagastia, mahastia, gaztainondoa, intxaurrendoa, urritxa, azokea, haizea, euria, adarra, mizpirua, ezkurra, limoia, mandarinea,



pikua, haritza.

Adjetiboak: euritsua, haizetsua, mamitsua, lehorra, garratza, mingotsa, gozoa, latza, leuna, gogorra, argia, iluna, biguna.

Aditzak: Prestatu, erein, inausi, euria egin, zimeldu, jausi, igertu, horitu, busti, lehortu, dastatu, jan, ikutu, apurtu, batu, ilundu, aldatu, zatitu.

Adberbioak: busti-busti, askotan, gitxitan, bizkor, laster, berandu, gaur, atzo, bihar, aurten, igaz, beti.

## "PATXI ERREMENTARIA"



### IPUINA

Patxi errementaria burdin-lanetan ebilen gizon gaiztoa zan. Horregaitik deabru (demonino) bat etorri jakon bila, bera infernura eroateko. Deabru honek Zart eban izena.

-Patxi, oso gaiztoa zara eta zu infernura eroateko etorri naz.

-Bai, baina lehenago gosaldu egingo dogu. Jesarri aulki horretan! -esan eutsan Patxik.

Amaitu eben gosaria eta Patxik esan eutsan:

-Goazen orain infernura, Zart!

Baina Zart ezin zan zutundu Patxi gaiztoak pikea (sustantzia eranskorra) ipini eutsan aulkiari ipurdian eta. Deabrua aulkian erantsita egon zan holantxe hiru urtez.

Ha infernura joan zanean, beste deabru bat bialdu eutsien Patxiri. Deabru hau Axut zan. Baina Zartek esan eutsan Axuti:

-Patxi oso gaiztoa da eta aulkian jesartzeko esaten badeutsu, zuk ezetz esan. Ni hantxe euki nau aulkian josita legez hiru urtez.

Heldu zan Axut Patxiren etxera eta esan eutsan:

-Oso gaiztoa zara, Patxi, eta zu infernura eroateko etorri naz.

-Bai, baina lehenago gosaldu egingo dogu. Jesarri aulkian!

-Ez, ez naz jesarriko.

-Orduan, etzun ohean.

-Bai, horixe egingo dot.

-Baina ohean ere pikea emonda eukan eta erantsita geratu zan Axut deabrua. Hau ere hiru urte egon zan halan ohean. Patxik askatu ebanean infernura joan zan eta hirugarren deabru bat bialdu eutsien Patxiri. Deabru hau Gatz zan. Baina etxetik urten aurretik esan eutsan Axutek Gatz:

-Patxi oso gaiztoa da eta kontuz ibili. Aulkian jesartzeko edo ohean etzuteko esaten badeutsu, zuk ezetz esan. Han egon gara Zart eta ni hiru urtez erantsita.

Joan zan Gatz Patxiren etxera eta esan eutsan:

-Oso gaiztoa zara, Patxi, eta zu infernura eroateko etorri naz.

-Bai, baina lehenago jan egingo dogu. Jesarri aulkian!

-Ez, ez naz jesarriko.

-Etzun, ba, ohean!

-Ez, ez naz etzungo.

-Orduan, joan ikoak jatera, oso gozo dagoz eta.

-Bai, horixe egingo dot.

-Baina iko-arbolan (ikondoan) ere pikea emonda egoan eta Gatz gizarajoa erantsita geratu zan. Holan hiru urte egon zan, eta eskolako umeak harriak botaten eutsiezan.

Ha askatu eta ez jakon gehiago deabrurik etxera etorri. Baina Patxi zahartu egin zan eta hil aurretik bere erremintak hartu ebazan hiltzen zanerako: alikateak, tenazak, burdin-ziria, mailua. Eta hil zanean erreminta honeekin han azaldu zan infernuko atean:

-Dan-dan-dan!

-Nor da?

-Patxi errementaria!

Deabru guztiak hori entzuketan bildurtu egin ziran eta infernuko atea itxi egin ebezan, atean kontra mahaiak, aulkiak eta ahal eben guztia ipiniz. Eta deabruen nagusiak Patxi zelangoa zan ikusi nahi izan eban zulo txiki batetik, eta Patxi burdin-ziria hartu eta begia atera eutsan.

-Ai, ai, ai!!!... -esaten eban minez deabruen nagusiak.

-Ze ai! eta ze oi! dino tontolapiko horrek! -oihu egin eutsen Patxi errementariak.

Orduan beste deabru batek Patxiren ahotsa entzun nahi izan eban zirrikitu baten belarria ipiniz, eta Patxi tenazak hartu eta belarria kendu eutsan.

Deabruak ez eben Patxi maite eta esan eutsien:

-Alde hemendik, Patxi! Alde!

Orduan Patxi zerura joan zan.

-Dan-dan-dan!

-Nor da? -itaundu eban San Pedrok, zeruko atezainak.

-Patxi errementaria!

-Patxi errementaria? Zu gizon gaiztoa zara eta ez zara zeruan sartuko.

Baina orduantxe atso zintzo bat etorren zerura soineko luze-luzea jantzita. Eta Patxi haren zain egoan. San Pedrok atea zabaldu eutsan atsoari eta Patxi errementaria haren soinekopean gordeta sartu zan zeruan betiko.

## -ALKARRIZKETA

- \* Zelako gizona zan Patxi?
- \* Horregaitik nor etorri jakon?
- \* Zein zan lehenengo deabruaren izena?
- \* Zer jazo jakon gosaltzera joan zanean?
- \* Axut, bigarren deabrua, jesarri zan aulkian?
- \* Axut non geratu zan erantsita?
- \* Zenbat denpora egon zan ohean Axut?
- \* Zein zan hirugarren deabruaren izena?
- \* Zer jatera joan zan Gatz?
- \* Etorri jakon deabru gehiago Patxiri?
- \* Patxi hil zanean zer eroan eban infernura?
- \* Patxi infernura heldu zanean zein deabruk urten eutsan?
- \* Patxi nori kendu eutsan belarria?
- \* Maite eben deabruak Patxi?
- \* Nora sartu zan azkenean Patxi?

## - HIZKUNTZA FUNTZIOAK LANTZEN

Zerbait proposatzen: - Zer moduz sartuko bagina?  
- Sartuko gara?  
- Eta sartzen bagara zer?  
- Zergaitik ez gara sartzen?

Arrazoia emon: - Halan hobeto dalako.  
- Nik hori uste dodalako.

Ez sinistu: - Bai, zera!  
- Tira, tira...  
- Hala, hala ...!  
- Nik ez dot holakorik sinisten.  
- Esan be!

## - IPUINEKO ESPRESIOAK

- \* Oso gaiztoa zara.
- \* Bai, baina ...
- \* Ez, ez naz jesarriko.
- \* Bai, horixe egingo dot.
- \* Dan, dan, dan!
- \* Nor da?
- \* Ai, a., ai!
- \* Ze ai! Eta ze oi!
- \* Alde hemendik, Patxi! Alde!
- \* Tontolapiko horrek!

## - IPUINEKO HIZTEGIA

Errementaria, burdin, gaiztoa, infernua, gosaldu, pikea, erantsi, jesarteko, gizarajoa, erremintak, alikateak, tenazak, burdin ziria, mailua, oihu, zirrikitu, zerua, itaundu, , atezaina, atso, zintzo, soineko, soinekopean gordeta.

## 3. GAIA: GABONAK NEGUAN OSPATZEN DIRA

### HIZTEGIA

Izenak: eguraldia, negua, gabonak, hotza, izotza, edurra, euria, txingorra, zerua, aingerua, izarra, goroldia, hostoa, adarra, lupetza, gaztaina, intxaurra, gorostia, pinua, zuhaitza, Jaiotzea, Olentzero, Jesus, erregea, estalpea, Ama Birjiña, San Jose, turroia, txanpana, sehaskea, gozokia, konpota, oparia, almendrea, hegaztia, txoria, tanbolina, sukaldea, artzaina, ardia, taldea, artaldea .

Adjetiboak: hotza, beroa, luzea, laburra, gozoa, zaharra, barria, apaina, epela, arina, astuna, pisutsua, lodia, mehea, lehorra, bustia, zintzoa, apala, leuna, zuria, baltza, horia.

Aditzak: jantzi, erantzi, jatsi, banandu, hurreratu, estaldu, apaindu, babestu, zoriondu, ikusi, abestu, urten, sartu, poztu, dastatu, eskatu, biztu, josi, estali.

Adberbioak: hainbeste, zurituta, baltzituta, beteta, alboan, goian, aurrean, atzean, gainean, iluntzean, pozik, igaz, aurtan.



## "GABONAK"

### IPUINA

Gabonetan zerutik aingeru talde handi bat etorten da lurrera. Opariak, paketeak, gozoak ekarten dabez eta ume onei emoten deutsiez.

- Behin baten Gabon eguna zan eta aingeru mordoa jatsi zan zerutik.

Aingeru txikienak herri txiki bateko umeei opariak banatzeko agindua jaso eban.

Gaua zan. Hotz handia egiten eban. Edurrak teilatu guztiak zurituta eukazan. Aingerutxoa etxe askotan sartu zan eta umeentzat opari asko itxi zituan.

Herritik urteterakoan, errekondu baten txabolatxo errukarri bat ikusi eban. Txabolea zaharra zan eta edurrak ia estalduta eukan. Txabolara hurreratu zan.

Badago hemen umerik? -itandu eban.

Inork ez eutsan erantzun. Aingerutxoa leihora hurreratu zan eta barrura begiratu eban.

Zer dago hor?

Arbasta batzuen gainean zabaldua zaku zahartxo batzuekin estalduta, umetxo bat egoan. Bakarrik egoan txabolan umea. Aingerutxoa barrura sartu zan. Hotz egoan. Sua amatauta, itzalita. Aingerutxoa barrura sartu zanean, txabolatxo dana argitu zan eta etxe guztia berotu egin zan. Sua ere isiotu egin zan.

Aingerutxoak umetxoarengana hurreratu eta mosu handi bi emon eutsazan. Etxea opariz, gozoz eta janariz bete eta zerura joan zan.

Amatxo etxera etorri zanean, harritu egin zan etxea hain bero aurkitzean, halako usain gozoa sentitzean eta hainbeste janari ikusita.

-Nor egon da hemen? -itandu eutsan semetxoari.

-Amatxo, amesetan egin dot. Aingerutxo bat sartzen ikusi dot. "Ikusten zaitut, ikusten zaitut" esaten izan deustat aingerutxoari, baina amesetan egon naz eta ez deust entzun. Aingerutxoa ikusi dot nik sua isiotzen, opariak ipinten, janariak pilatzen. Eta bere lagunak barrez ikusi ditut leihoan kanpotik. "Ikusten zaituet, ikusten zaituet" esan eta barre egin deutset, baina ez deustie entzun amesetan egon nazalako. Baina barre egiten izan dabe.

-Etorri zaitez semetxo, etorri. Zeruko aingeruak etorri dirala uste dot neuk ere. Gaur Gabon eguna da. Eta gora ta behera ibiltan dira aingerutxoak ume onak ikusten.

-Amatxo, orain ez nago amesetan eta ez ditut ikusten. Lehen amesetan ikusi egin ditut.

## - ALKARRIZKETA

- \* Zer jazoten da Gabonetan?
- \* Zer emoten deusiee aingeruak umeei?
- \* Zer itandu eban aingerutxoak txabola aurrean?
- \* Zer egon zan txabola barruan?
- \* Zer jazo zan txabola barruan aingerua sartzerakoan?
- \* Zer ikusi eban umetxoak amesetan?
- \* Azkenean, amesetan egon zan umetxoa?
- \* Ipuinaren laburpen bat egin daiela eskatu umeei.

## - HIZKUNTZA FUNTZIOAK LANTZEN

Arreta erakarri:           - Entzun!  
                                  - Entzun, mesedez!  
                                  - Aizu!  
                                  - Adi egon danak!  
                                  - Begira!  
                                  - Entzungo al deustazue?

Arretaz       - Zer nahi dozu?  
:               - Zer?  
                  - Bai?  
                  - Bai, zer?  
                  - Bai, esan?

Zerbait egiteko argidua emon:

- Habeto azalduko deusut.
- Nire laguntza izango dozu.
- Lagunduko deusut egiten.
- Hori ez egin holan, honan baino.
- Hoba dozu holan egin.

## - IPUINEKO HIZTEGIA

Zerutik, talde, opariak, Gabon eguna, mardo, jatsi, aingeru, jaso, erreando, txabalatxa, errukarri, estaldu, arbasto, sua, amatauta, itzalita, isiotuta, amesetan.

## **4. GAIA: NIRE AITAK ETA AMAK LAN EGITEN DABE**

### **HIZTEGIA**

Izenak: etxea, sendia, aita, ama, anaia, arrebea, ahiztea, nebea, lantegia, lanbidea, langabezia, langilea, nekazaria, suhiltzailea, dendaria, arotza,

sukaldaria, zapataria, jostuna, arrantzalea, osagilea, artzaina, tabernaria mekanikoa, garbitzailea, okina, uleapaindegia, igeltseroa, ikaslea, irakaslea, postaria, gidaria, argazkilaria, iturgina, kalezaina, soinularia, dendea, janaria, barazkia, edaria, arrantzea, arraindegia, azokea, soloa, lurra, tresnea, bulegoa, idazkaria, gosaria, bazkaria, askaria, afaria, egurra, harria, zementua...

Adjetiboak: handia, txikia, behartsua, aberatsa, zintzoa, zuhurra, alperra, langilea, bizkorra, nagia, lasaia, eroso, lodia, mehea, ederra, luzea, aburra, osasungarria, kaltegarria, biguna, gogorra, osasuntsua...

Aditzak: egin, saldu, erosi, ekarri, eroan, konpondu, garbitu, ureztatu, osatu, jagi, ikusi, zaindu, jantzi, erantzi, entzun, igon, marraztu, margoztu, bete, gastatu, jan, edan, moztu, zikindu, banandu, gidatu...

Adberbioak: goiz, berandu, atzo, gaur, bihar, inoiz, aspaldi, ...

Beste zenbait espresio: egurrezko, burdinezko, harrizko, lurrezko, artean, bitartean, barruan, kanpoan, gainean, inguruan, alboan, salgai, karuago, merkeago, arduratsu, ardurabako, ..

## **“ASTOKARGATUA”**



## **IPUINA**

Asto bat, zaku-gatza bizkarrean ebala, etxera joian tapa-tapa. Joan joiala, erreka bat zeharkatu beharrean aurkitu zan. Baina errekearen erdian, eskoiko hankeak laban egin eta, plast!, jausi egin zan uretan.

Zutundu zanean, zer eta, bere zama arindu egin jakola konturatu zan; eta, bustia busti!, ez zan biziki hasarretu. Esan ere egiten eban bere artean eta:  
- "Gaur ikasi joat ikastekoa, errekan busti eta zama arindu alajaina! Ez joat ahaztu behar haxe orratio!"

Hurrengo azoka-egun baten, belaki edo esponjazko zaku bat ipini eutsien astoari bizkarrean. Etxera etorrela, nekeak eraginda edo burura etorri jakon lehengo egunekoa. Artean ere urrun egozala, egundokorik arinen susmatu eban erreka toaren isuri-susmurrua, eta sudurreko zuloak zabal-zabal eta muturreko bizarrak tente-tente, poz baten joian, bere bideko nekeak hantxe gozatu eta arindu behar ebazala eta. Eta heldu zanean heldu, plasta! itxi eutsan jausten bere buruari, eta itxi ere urik sakontxoena egoan lekuan hain zuzen. Ha lasaitua hartu ebana!

Eta altzakeran? Orduan ziran kontuak! Urez bete ziran belakiak, eta nekez bai nekez jaso ahal izan eban bere burua. Gero puzzka jarraitu behar izan eban etxera-bidea. Izan ere, belakia eta gatza ez ziran bardinak!

### **-ALKARRIZKETA**

- \* Astoak zer eroan bizkarrean?
- \* Astoak non egin eban laban?
- \* Hurrengo azoka egunean zer jarri eutsien astoari bizkarrean?
- \* Eta altzau, zelan altzau zan?
- \* Zergaitik altzau zan nekez?

### **-HIZKUNTZA FUNTZIOAK LANTZEN**

Iritzia eskatzen:     - Atsegin dozu ipuina?  
                              Zer deritxazu?  
                              Zer, polita da?

Eretxia emoten:

- Oso palita da.
- Hori ipuinaren polita!
- Hau bai polita!
- Ez da polita.
- Ez jata bat be gustatzen.

### **-IPUINEKO ESPRESIO BATZUK**

- \* Etxera joian tapa-tapa.
- \* Plast jausi zan uretara.
- \* Baina busti-busti egin eta ez zan hasarretu.
- \* Gaur ikasi dot ikastekoa.
- \* Ez dot ahaztu behar haxe orratio!



- \* Susmatu eban erreka toaren isuri-susmurrua.
- \* Muturreko bizarrak tente-tente.
- \* Orduan ziran kontuak.

## - IPUINEKO HIZTEGIA

Bizkarrean, erreka toa, laban, plast, zama, arindu, belaki, susmatu, isuri susmurrua, tente, nekeak arindu, sakontxoena ...

## 5. GAIA: GURE INGURUKO ABEREA

### HIZTEGIA

Izenak: aberea, piztia, arraina, intsektua, usoa, arranoa, enara, ahatea, dortokea, zaldia, aumea, ahuntza, tigrea, lehoia, elefantea, azeria, erbia, otsoa, hartza, urtxintxea, sugea, balea, izurdea, basurdea, buztana, hegoa, okelea, narrua, arrautzea, apatxa, zaldia, marraskiloa, tximeletea, hankea, lumea, adarra, habia, igela, tximinoa, txakurra, txarria, behia, txahala, hegaz, uger, lauhankan, behorra, moxala, astoa, akarra, ardia, aharia, artxoa, oiloa, oilarra, txitea, idia, irrintzia, orroa, eulia, eltxoa, erlea, inurria.

Adjetiboak: zatarra, gaiztoa, bizkorra, motela, ahula, sendoa, gogorra, a\_rina, txikia, handia, basatia, mantsoa, astuna, polita, dotorea, mehea, sendoa, luzea.

Aditzak: hasarratu, ibili, joan, ekarri, egin, igon, egon, etorri, eroan, emon.

Adberbioak: Arin, bizkor, nekez, astiro, han, hor, hemen, hantxe, aurrean, atzean, barruan, kanpoan, zehar, zutunik, etzunda, zintzilik, berandu, goiz.

### “ ASTOA ETA OTSOA “



### IPUINA

Gauza guztiak hizketan ekien garaian gertatu zan hau. Behin baten astoa Nafarroatik Ataunera etorren, zahagi bat ardo bizkarrean ekarrela. Eta otsoak urten eutsan bidean, guztiz goseturik. Astoak esan eutsan otsoari:

-Egarri al haz, egarri?

Bajaukat hi(re)tzat  
edari.

Baina otsoak:

-Astotxo, enok egarri;  
baina bai goseak larri.  
Oraintxe jan behar  
deuazat hire buru ta  
belarri.

Eta astoak orduan:

-Hor goian jagok  
artalde, batere  
txakurrik gabe.  
Harantza doanarentzat  
han jagok bildotsa  
pare.

Baina otsoak barriz ere:

-Orpoan jaukat  
arantza, ezin nok  
joan harantza. hemen  
holako aukera ta  
zertara joan inontza?

Orduan astoak:

-Hor goian goian  
ermita, San Bartolome  
deritza; nik meza  
entzun artean goiazak  
biok harantza.

Otsoak ez eban joan nahi; baina azkenean, bera ardietara joan arte astoari ermitara joaten itxi eutsan. Baina astoak esandako lekuan artalderik ez eta otsoa ermitara joan zan. Astoa ordurako ermita barruan egoan eta, otsoa etorten ikustean, atzeko hanka biekaz ermitako atea gogor itxi eban: Orduan otsoak amorru bizian holan esan eutsan astoari:

-Asto zaharra mukizu,  
asko eta gehiegi dakizu.  
Barrero nik harrapatzean  
mezarik entzungo ez dozu.

Astoak, barriz, ermita barrutik:

-Otsango, otsango gazia,  
gaztean txarto hazia, bihar  
jango banok ere, bajoat  
gaurko bizia.

Astoa motela dala, baina oraingoan otsoa gertatu zan motelago astoaren ondoan.

**-ALKARRIZKETA**

- \* Zelan deitzen da ipuina?
- \* Otsoa nondik nora etorren?
- \* Zer ekarren bizkarrean?
- \* Nork urten eutsan bidean?
- \* Nork esan eban egarri al haz egarri?
- \* Non dauka arantzea?
- \* Zein hasarratu zan, astoa ala otsoa?
- \* Zein da motelagoa, astoa ala otsoa?

## - HIZKUNTZA FUNTZIOAK LANTZEN

Atsegina:

- Niri be hori gustatzen jata.
- Nik be hori nahi dot.
- Nik be nahi neuke hori.
- Nik hori nahiago dot.
- Baina nik hori nahi dot.
- Hori nire gustokoa da.

Atsegin eza:

- Ba, hori ez jat gustatzen.
- Hori ez da nir'e gustokoa.
- Hori ez dot nahi, bestea nahi dot.
- Hori ez jat bat be gustatzen, nahiago dot bestea.
- Nik hori ez dot nahi, hori zatarra da.

Beste esaera batzuk:- On egin.  
On dagizuela!  
- On dagizula!

## - IPUINEKO ESPRESIO BEREZIAK

- Egarrri al haz egarri?
- Bajaukat hiretzat edari.
- Orpoan jaukat arantza.
- Ezin nok joan harantza.
- Atea gogor itxi eban.
- Amorru bizian.
- Asko eta gehiegi dakizu.

## - IPUINEKO HIZTEGIA

Hizketan, garaian, gertatu, zahagi, goseturik, edari, gose, larri, artalde, gabe, pare, arantza, aukera, orpoan, inontza, ermita, gazi, motel.

## 6. GAIA: UDABARRIKO LORA ETA LANDARAK

### - HIZTEGIA

Izenak: hegaztia, txepetxa, txantxangorria, urtaroa, negua, udabarria, udea, lorea, susterra, zuhaitza, hostoa, kimua, hegaztia, habia, bedarra, landea,


tximeletea, eguzkia, ura, usoa, txirritxirria, berotasuna, epela, eguraldia, intsektua, inurria, erlea, hazia, enborra, adarra, landarea, lorategia, baratza, galtzua, arrautzea, txorikumea, margaritea, kukuprakea, txibiritea, larrosea, kalea, krabelinea, amapolea, kukua, matxinsaltoa, txamilotxea, marigorria.

Adjetiboak: apaina, dotorea, loratsua, txikia, urduria, alaia, hotza, beroa, epela, haizetsua, orritsua, indartsua, bizkorra, usaintsua.

Aditzak: abestu, loratu, usaindu, erne, erein, hazi, jantzi, epeldu, berotu, ikusi, landatu, ekarri, hartu, harrapatu.

Adberbioak: txiotxioka, pozik, hur, urrin, arin, astiro, han, hor, hantxe, beti, gehiago, asko, gitxi, gitxiago.

**"IPARRAIZEA ETA EGUZKIA"**



## IPUINA

Behin baten apostua egin eben iparraizeak eta eguzkiak ea biotatik gehiago zein ete zan. Haizeak bera zala inoan, eguzkiak barriz bere burua jotzen eban indartsuagotzat. Zelan neurtu bien indarrak?

Gizon bat ikusi eben bien artean bidean joiala: txapela buruan, eta soinean abrigo bat. Eta esan eutsien alkarri:

- Gizon horri txapela burutik eta abrigoa soinetik kentzen deutsanak, harexek irabaziko jok apostua, eta bera izango dok garaile.

Zotz egin eta haizea hasi zan lehenengo lanean. Masailak betean hasi zan puzka. Arbolen adarrak batera eta bestera erabilzan eskuekin kontu asko esaten dabezana atso barritsuak legez. Lehenengo haize-boladak ia txapela eroan egin eutsan gizonari burutik.

Orduan esku biekaz heldu eta belarrietaraino sartu eban. Haizeak orduan eta gehiago. Txistu baten erabilzan adar, hosto eta lurreko hautsak. Gizonak abrigoa botoi guztiekin lotu-lotu egin, sakelean eukan bufanda saman buelta bi emanda jarri eta esku biek txapelari helduz, makur-makur eginda joian, haizearen kontra ezin ebalako aurre egin. Azkenean, neka-neka eginda, han inguruan aurkitu eban babesgune baten geratu zan haize zakar harek joteari itxi arte. Haizeak hori ikusi ebanean, galdutzat emon eban bere apostua, eta eguzkiari itxi eutsan txandea.

Eguzkia astiro-astiro hasi zan, lehenengo argitzen, gero berotzen. Gizonak hori ikusi ebanean, eta haizea gelditu egin zala, bideari ekin eutsan barrero. Baina eguzkiak gogor jotzen ebanez, lehenengo samako bufandea kendu eban, gero abrigoa askatu. Bero egiten eban, ostera, bero, eta txapelak berak ere izerdia emoten eutsanez gizonari, kendu egin eban hau ere eta eskuan hartu. Baina lehenengo hotzikarak gizonari kendu eutsazanean, ekinahalean hasi zan eguzkia berotu eta berotu. Gizon gizajoak ezin eban gehiago. Heldu zan

pago handi baten itzalera eta txapela, abrigoa eta txamarrea kenduz, bedar gainean etzun zan beso eta hankak zabal-zabalik. Halan ere, bero eta beti bero. Orduan, han inguruan aurkitzen zan erreka koskor baten sartu zan bere jantziak pagondoaren azpian itxirik.

Eta galdetu eutsan orduan eguzkiak haizeari.  
Heuk irabazi dok – erantzun eutsan haizeak.

## -ALKARRIZKETA

- \* Nork egin eban apostua?
- \* Ze apostu egin eban?
- \* Lehenengo haize boladak zer kendu eutsan gizonari?
- \* Haizearen aurka egiteko zelan joian gizona?
- \* Eguzkia zelan hasi zan?
- \* Gizonak lehenengo zer kendu eban?
- \* Abrigoa ta txamarrea kendu eta non etzun zan?
- \* Azkenean non sartu zan?

## - HIZKUNTZA FUNTZIOAK LANTZEN

Ustekabea: - Ene, zer da hau?  
-Aizu, baina.  
-Hau da gauza harrigarria!  
-Ikusgarria da!  
-Hau da suerte txarra!  
-Hau zoriona!  
-Ze arraio da hau.

Poza: - Hau poza!  
-Ze onda!  
-Ze ederto!  
-Oso pozik nago.  
-Hau da hau!  
-Hori dok eta!  
-Ezin hobeto!  
-Oso ona benetan.  
-Pozten naz.

## IPUINEKO HIZTEGIA

Apustu, indartsuago, garaile, zotz egin, masaila, puzka, adarrak, barritsua, heldu, adar, hasta, hautsak, sakelean, saman, neka-neka, zakar, txanda, hotzikarak, gizajoa, pago.

## 7. GAIA: ARGIA IKUSI EGITEN DOGU

### HIZTEGIA:

\* Izenak:

Eguzkia, eguerdia, ilbehera, ilargia, bonbilea, ilgorea, izarra, kandlea, semaforoa, tximistargia, farola, argitasuna, ipurtargia, lainoa, udea, gaua, gerizpea, udabarria, iluna, zuzia, posporoa, eguna, goiza, iluntasuna,

zerua, egunsentia, argi-ontzia, linternea, eguerdia, ontzia,....

\* Adjetiboak:

diztiratsua, izartsua, zuria, izugarria, argia, baltza, gogorra, makala, laranja, biguna, indartsua, hotia, gorria, zabala, lehuña, iluna

\* Aditzak:

Argitu, ekarri, urten, ilundu, eroan, sartu, berotu, isiotu, hasi, ikusi, amatau, esnatu, osotu, gorritu, ezkutatu

\* Adberbioak:

Zintzilik, asko, gitxi, isiotuta, aurrean, atzean, amatauta, nahiko, azpian, egunez, gehiago,...

## "EGUZKIA ETA IPURTARGIA"



### **IPUINA**

Eguzkia harro-harro egoan. Egun osoan bazterrak bero-bero egin ebazan. Baina gaua etorri zan eta laino bandi batek bere kolkoan sartu eta gorde eban eguzkia.

Ipurtagia, egun osoan bedarpean ezkutatuta egon zan eguzkiaren argitasunak itsutu bebarrean. Baina eguzkia lainoak irunsi eta kolkoan gorde ebenean, bere ipurdiko argitxoa isiotu eta landan zebar ibiltzen basi zan. Haren barreak ez eben amairik. Eta eguzkiari adarra jotea pentsatu eban.

Eup, esan eutsan ipurtargiak, zureak zer balio dau ba? Egunez dana argi dagoanean harrokeriak jotea erreza da. Etorri oraintxe landara zeinek dogun argi gehiago ikustera!

Eta ipurtargiaren ipurdiko bonbileak argi briztadak botaten ebazan. Neuk dakart landara argitasuna, eta ez zuk. Dana argi dagoanean ez dau balio, esan eban ipurtargiak.

Gaua gauezkoentzat; ni egunezkoa naz eta egunero dakart argia. Egunez zuk zer dakarzu ba? -erantzun eutsan lotsaz beterik eguzkiak lainoaren kolkotik.

Ba zuk baino argi handiagoa gauez -esan eutsan ipurtargiak-. Nik eta semaforoak eta bonbilak gauez egiten dogu argi, gauez. Preminea dagoanean eta ez egunez, dana argi dagoanean. Geuk dakargu gaueko argitasuna. Eguzkiak ez ekian zer erantzun. Lotsatuta egoan. Lainoaren kolkoan sartuta, lotsaz gorrituta egoan.

Eee! Isiotzen bazara, zer ikusten dogun, gero esango deutsugu. Ipurtagiaren adar joteak ez eukan amairik.

Baina goizaldea etorri zan eta eguzkia, lainoaren kolko ertzetik begi bat ata-

ra, eta begira hasi zan. Ipurtargiaren argia brast! Itzali zan, eta bedarpera ezkutatu zan gauera arte. Dana argi egoanean ez egoan argi premiarik. Atzo ere argia emon neutsun, eta gaur ere ikusten bazaitut, argia emongo deusut. Eguna egunezkoentzat, -esan eban eguzkiak. Ipurtargia isilik egoan. Eguzkiak itsutuko ete eban bildurrez egoan. Sekulako argitasuna eukan eguzkiak. Munduko ipurtargi guztiak batera ipinita baino argi handiagoa. Baina ipurtargiak baekian gaua etorkeran eguzkiak ez ebalaa argitasunik, eta hobeto itxaroteko loaldi eder bat bota eban. Neure argitasuna ipurdiko bonbilan sartu eta haxe erabiltzen dozu. Baina ipurtargia, bere bateriak beteten, bedarpean egoan lo. Zu. Non zagoz orain, ipurtargi?

## -ALKARRIZKETA

- \* Nor egoan harro-harro?
- \* Zelan euki ebazan eguzkiak bazterrak egunez?
- \* Nora joan zan gauez eguzkia?
- \* Zer jazo zan gero?
- \* Zer esan eutsan ipurtargiak eguzkiari?
- \* Harroputza da ipurtargia?
- \* Zergaitik da harroa?
- \* Non egoten da egunez ipurtargia?
- \* Zer egiten dau egunez?
- \* Zerk emoten deuto argia ipurtargiari?
- \* Zein da handiagoa ipurtargia ala eguzkia?
- \* Nork esan eban, gaua gauezkoentzat?

## - HIZKUNTZA FUNTZIOAK LANTZEN

Ezinezkotzat jo:            Zer dinozu? Ez da egia izango?  
                                         Ezinezkoa da hori!  
                                         Zelan izan daiteke hori?  
                                         Tira, tira! Nork esan deuto hori?

## 8. GAIA: JANARIA EROSI EGITEN DA

### HIZKUNTZA HIZTEGIA

#### \*Izenak

saltzailea, dendea, dendaria, ogitegia, usaintegia, igalitegia, harategia, arraindegia, ogia, uruna, ontzua, saltokia, gozotegia, eroslea, azoka, txanpona, txartela, okelea, botikea, liburudendea, sagarra, igalia, arraina, jostailua, liburua

#### \*Adjetiboak

merkea, karua, gozoa, garratza, polita, zatarra, handia, txikia, luzea, zabala, apaina, dotorea, egokia, bizkorra, desegokia



\*Aditzak

saldu, orosi, usaindu, ordaindu, janedan, eroan, ekarria, hartu,  
begiratu, zaindu, batu, ukeratu, kendu, kobratu

\*Adberbioak

non, noiz, zer, zelan, zelako, gitxi, asko, gitxiago, gitxiago, bardin, arin,  
bizkor, gehiago, karuago, merkeago, raintxe, zabalik, itxita, handien,  
txikien

## "MIREN ESNETARIA"



### IPUINA

Miren bizikleteari atoe bat lotu eta azokara doa esneagaz. Pozik doa. Esneak asko balio dau.

"Esne diruaz ehun arrautza erosiko dodaz eta oilo zuriari ezarri eta ehun txita eukiko dodaz. Artoa emon eta handi egiten diranean, makera bat erosiko dot. Makereak hamabost ume egingo dauz. Ezkurra eta artoa janda handi egingo dira. Makerea eta txarrikumeak salduta, behia erosiko dot. Behiak txahala egingo dau eta biak salduta, autoa eta oihaletxabola barri bat erosiko dodaz oporretarako".

Pozarren bizikleteari bizkorrago eragiten hasten da eta bidearen bihurrunean irrist egin eta esne ta guzti jausten da.

Miren negarrez hasten da.

Agur nire esne eta arrautza, oilo, txita, makera, txarrikume, behi, txahal, auto eta oihaletxabola.

### -ALKARRIZKETA

- \*Nora doa Miren ?
- \*Zenbat balio dau esneak?
- \*Zer doa saltzen Miren?
- \*Zer gura eban erosi esnearen diruaz?
- \*Zuk zer erosiko zeunke diru horren bidez?
- \*Zelan amaituko zeunke ipuin ha?

### HIZKUNTZA FUNTZIOAK LANTZEN

## Informazio eskaera

Zer gertatzen jatzu?  
Zer dozu?  
Zer pasatzen jatzu?  
Zergaitik egiten dozu negar?  
Zergaitik zagoz negarrez?

## Segurtasuna emon

Egon nasai, hori ez da ezer!  
Ez negarrik egin.  
Ala, ala, pasau da.  
Egon trankil, ez da ezer izan.

## **IPUINEKO HIZTEGIA**

Atoe, azoka, ezarri, artoa, ezkurra, oihaltxabola,  
eragin, bihurrenean, irrist, atsekabez, ametsetan.

- Zerbait proposatu:
- Gauza bat pentsatu
  - Badakizue zerekin gogoratzen nazan?
  - Gauza bat bururatu jat

- Harridura:
- Ez da egia izango!
  - Ai ene!
  - Ene bada!
  - Ai ama!
  - Jesus, Maria ta Jose!
  - Izugarria da!

## **IPUINEKO ESPREZIO BEREZIAK**

- Eguzkia harro harro egoan
- Gaua gauezkoentzat.
- Lotsaz gorrituta egoan.
- Eguna egunezkoentzat.
- Argia brast amatatu zan.
- Sekulako argitasuna eukan eguzkiak.

## **IPUINEKO HIZTEGIA:**

bazterrak, kolkoan, ipurtargia, bedarpean, ezkutatuta, itsutu, iruntsi, isiotu,  
amatau, bristadak, lotsaz, preminea, goizaldea.

## 9. GAIA: ARRANTZALEAK

### HIZTEGIA

#### \*Izenak

oporra, garraioa, astia, jaia, barrakea, itsasaldea, autoa, argazkia, jantzia, beroa, postala, ibilaldia, iluntzea, kotxea, motorra, autobusa, bizikleta, patineta, hagazkina, itsasuntza, txalupa, errepidea, autopistea, gurasoa, ugera, arratsaldea, lurgarraioa, airegarraioa, udea, urteera, berotasuna, ikasturtea, mendia, jolasa, hondartzea, laguna, mendigoizalea, ilunabarra

#### \*Adjetiboak;

polita, zatarra, epela, bizkorra, motela, dotorea, handia, txikia, argia, iluna, eguzkitsua

#### \*Aditzak;

ibili, joan, ikusi, egin, ekarri, itzuli, abiatu, hasi, hazi, heldu, igon, jatzi, egon, poztu

#### \*Adberbioak;

pozik, egunero, beti, gehien, gitxien, bizkorrago, txarto,  
goian, motelago, ondoan, bazterrean, goiz, berandu,  
aurten,  
igaz, beti, betko, gehiago, ondo

## ARRANTZALE TXILIBITU JOTZAILEA



### IPUINA

Arrantzale bat, txilibitua eta sarea berarekin hartuaz, arrantzara joan zan.

Itsasertzeko harkaitzetako baten gainean zutik jarri zan eta txilibitu joten

hasi zan, holan arrainak berenkasa etorriko zirala pentsatuz. Baina bai

zera

etorri, bera nekatu zan txilibitu jotzen arinago. Eta halan, azkenean txilibitua

zakuan itxi eta sarea uretara bota eban. Eta ha zan arraina harrapatzea, sarerik ere ezin atera, ozta ozta baino.

Hondartzara etorri eta saretik arrainak batzen hasi zanean, salto hemen eta

salto han hasi ziran arrainak, eta arrantzaleak esan eutsen:

-Tonto alenak, hor ibili zuei txilibitua jo ta jo eta ez dozue dantzarik egin

nahi izan. Eta ni aspertu nazanean orain nahi dozue dantzan egin!

Orain zakura eta geldi hor!

## ALKARRIZKETA

\*Arrantzaleak zer hartu eban?

\*Non ipini zan arrantzalea?

\*Zer joten hasi zan?

\*Zertarako joten eban txibilitua?

\*Nor nekatu zan lehenago?

\*Non itxi eban txibilitua?

\*Zertan hasi jakozan arrainak hondartzan?

\*Azkenean nora sartu ebazan arrainak?

## HIZKUNTZA FUNTZIOAK LANTZEN

Arreta erakarri

-Aizu, begira!

-Ikusi zer daukadan!

-Beitu!

Informazioa eskatu

-Ene, zer daukazu?

-Aizu, zer daikazu hor?

-Zer da hori?

-Zer da hor daukasuna?

-Zer dozu?

Informazioa emon

-Begira zer daukadan barruan,

-Boltsa barruan panpin bat daukat.

Aholkuak emon

-Kontuz eta ez busti.

-Kontuz jausi barik.

-Kontuz urrinerara ez joan.

## -IPUINEKO ESPRESIOAK

\*Baina bai zera etorri!

\*Ozta-ozta baino.

\*Salto hemen eta salto han.

\*Tonto alena.

\*Orain zakura eta geldi hor!

\*Beren kasa etorriko ziralakoan,

## IPUINEKO HIZTEGIA

Txilibitua, sarea, arrantzara, itsasetzeko, beren kasa, ozta-ozta, arkaitzetako baten, aspertu